

兩
浙
名
賢
錄

兩浙名賢錄卷三十七目次

清正

明三

禮部尚書江文淵

兵部尚書王漢英

福建僉事陶習之

山東按察副使韓守清

湖廣副使王時化

大理寺卿葛天宏

附子木

豐城縣縣丞陸文溥博

山東運鹽副使鄭信卿兼

貴州布政使李仁仲麟

成都知府費希明愚

子思義附

河東運鹽使馮行甫志

兵科給事中牧時庸相

工部主事李一清滄

四川參議顧尚誠正

左都御史屠安卿倚

刑部尚書何巨卿

刑部右侍郎王景昭

山西按察僉事孫朝信

僉都御史王叔在

監察御史黃夢弼

長洲知縣鄭溫卿

右都御史車秉文

尚寶司卿劉伯雨

提學副使蕭子雝

南雄府知府張德卿

晉江縣知縣張文宿

福建僉事沈伯元弘道

監察御史俞汝成集

貴州副使諸揚伯

子孫

南昌府通判嚴敬宗

南寧府知府盛源之

淮安府通判王本源

南昌知府鍾彥材

江西按察使謝國正汝儀

鎮江知府陳德卿文舉

工部員外徐成孚用光

子附

臨江知府錢公良琦

子芹
萱附

工部郎中姜幼章綱

光祿寺卿陸文東淞

山東布政使邵思抑銳

真定府同知胡仁甫擇

兵科給事李九臯鶴鳴

兄附

右副都御史戴時重賢

陝西左叅政陸原博溥

南京右通政余子華本

光祿寺少卿金信夫廷瑞

副都御史柴季常經

禮科給事中章景南适

開封知府沈體行光大

倉部御史陸秀卿邨

國子監丞陳正初旅

河南按察僉事湯子雅彬

廣西副使錢守禮立

太常寺卿嚴汝肅大紀

工部侍郎金汝德元立

右僉都御史趙大聲鏜

四川按察使馮執夫亮

兩浙名賢錄卷三十七目次終

兩浙名賢錄卷之三十七

東海徐象梅仲和氏謨

武塘孫叔呂冲和氏閱

清正

明三 共六十五人

禮部尚書江文淵

江淵字文淵，仁和人。成化戊戌進士，選庶吉士，授編修。修憲廟實錄，陞侍讀，克經筵講官。奉命冊封荆王，力却餽贍，其僕亦卻常例，曰：「不欲以是污吾主人。」簡克東。

官講讀陞侍讀學士纂修大明會典陞學士武廟登
極陞詹事府少詹事仍充講官掌翰林院事克孝廟
實錄副總裁晉吏部右侍郎守官勤慎嚴管鑰不通尺
書著銓育日錄以自檢雅不善逆瑾改南京禮部尚書
濶爲人溫厚純慤不逆人詐仁愛周洽喜濟人急冊封
荊王時見覆舟於棗林濶亟呼左右拯之左右曰吾舟
方在急奚暇急人濶厲聲曰安有見人死不一援者卒
救之濶舟亦無恙居家孝友篤於故舊歷任三十餘年
不治產業曰吾不欲以是上負先德下累子孫也卒贈

太子少保謚文昭

兵部尚書王漢英敞

王敞字漢英其先衢之西安人洪武初以尺籍隸錦衣衛遂家南京成化庚子以詩經薦於鄉明年辛丑中會試第三人賜進士出身授刑科給事中陞工科右給事中孝宗卽阼賜一品服使朝鮮國其國主令陪臣出女樂燕敞敞曰天子在諒陰中吾何忍聽此其國君臣相顧媿歎乃遣去復命陞左尋晉都給事中凡所敷奏率人所不能言者章上輒毀草曰吾職當爾非以是爲

沽名地也。歷陞通政司左參政。母艱服闋。補原官。尋陞
通政使。以考績。晉兵部左侍郎。拜尚書。武功黃選冊在
內府印綬監。凡遇除選。必入內查對。輒爲所難。例納重
賄。始得如期對視。敵請騰副於部。以便選法。命兼提督
京營軍務。賜蟒衣。以平寧夏功。加太子太保。蔭子會錫
衣百戶。時逆瑾甫誅。敵申明舊章。凡瑾所更置者。盡革
之。山東四川相繼盜起。請增設諸要地兵備。憲臣定賞
罰條格。分令巡撫官嚴督軍民兵。恭備其用。諸將官及
薦諸總制大臣。皆允。一時人望中外。方倚賴之。而敵以

盛滿爲懼。逐乞休致。疏七上。乃得允。既歸。日居東山。與朋舊賦詩爲社。篇章傳播。一時以爲有香山洛社風。人有犯不與校。風神蕭散。若於世故不經心者。然所任輒有能聲。凡建白多切事宜。通國體比主兵。假大變。猝至以身富之。延納羣議。行之不啻已出。垂紳正身於巖廊之上。不數月。疆土復安。人始服以爲不可及。見人煦煦若和易。無崖岸而實潔。廉自持。堅不可拔。其在兵部。凡餽謝悉却之。所歲積柴薪羨餘毫髮無所取。及卒。蕭然四壁。圖書之外無長物。計聞贈太子太保。賜諭祭者四。

勅工部營兆域皆如制

福建按察僉事陶習之懌

陶懌字習之會稽人幼穎悟日記數千言走筆爲文無
停思一時以爲才弘治初登進士第初授刑部主事獻
獄持平人稱不冤然不爲貴勢撓戚里有殺人者同事
意寬之懌竟抵之法不少徇累遷福建按察司僉事逆
瑾邀賂且曰與我市不愁無美官懌歎曰不義而富且
貴於我如浮雲遂以廣東參議致政歸所著有克齋稿
山東按察副使韓守清廩

韓庶宇守清餘姚人弘治丙辰進士授任縣知縣任上
監人貧多轉徙庶加意撫循不一年民皆復業最聞徵
拜廣東道監察御史出按福建風裁凜然漳南盜肆侵
掠督師勦平之詔賜白金彩幣當是時逆瑾擅權欲以
嬖倖冒軍功邀世賞脅庶以禍福不爲動乃籍他事留
再巡福建冀必獲庶抗持益力瑾遂矯詔謫高安縣知
縣已又索廢舊任鎬秩者三庶益抗持不少屈瑾大怒
遂逮繫詔獄人爲庶憂庶笑曰死生命也逆瑾其如我
何憂之無益處之裕如踰年而瑾誅自獄中除判通州

稍遷潞州守以憂去補知秦州晉河南按察司僉事轉
山東副使兵備天津卒以亢直失兩臺意復調辰州府
知府庶屢躋屢興馳驚南北宦轍所至必孤行一意不
以挫折變其初自顧不偕於世遂上疏乞休不報會
世宗皇帝登極崇獎恬退再疏得旨復以山東按察司
副使致仕歸庶乃開別圃植花卉日與耆舊觴咏爲樂
非飲射讀法足不履公庭郡邑諸大夫有終任不覩其
面者行部使者至餘姚必造其廬而問焉卒年九十四
湖廣按察副使王時化銘

王鎔字時化，大中丞純之子也。弱冠第進士，初授刑部主事。時巨闕犯大辟，內批末減，乃抗疏執奏。尋俸者再，詔獄多濫，無敢異同。鎔獨平反二十餘事，衆皆以爲難。遷員外郎，郎中樞貴，或以獄詞爲託，還其詞，知且賈禍，乃乞改南京刑部。繼改兵部車駕司，減乘傳十之四五。奏革內使進貢船凡五百艘，省歲費數千金。清諸衛草場，大司馬王廷相倚以爲重。陞雲南兵備副使，轉湖廣副使，置竹谿堡，築潛江隄，立正學書院以造士。撫按交章薦之以嫉惡過嚴，構怨貴倖，遂引年歸。言官奏起之。

有司勅駕卒不應居家儉素出入無車馬之飾父子一德月旦以爲賢

大理寺卿葛天宏浩

子木附

葛浩字天宏上虞人弘治中進士初令五河五年拜南臺御史論劉瑾下獄黜爲民瑾誅復起爲邵武守六年進參政歷大理寺卿浩耿介廉靖所至郡縣咸有去後思參政廣東時平新寧寇不妄殺一人在大理能持法恕廷中稱平家居杜門讀書內行修謹鄉邦以爲楷模年九十二卒贈刑部右侍郎子木字仁甫正德中進士

歷刑部出知淮安。淮號衝疲難治。木唯鎮以簡靜。而加
意撫字。節冗弛禁。富者不苦於役。貧者得負鹽以自活。
淮民戴之如慈父。遷山東副使。轉山西叅政。卒於官。喪
還過淮。老幼相携哭奠。皆盡哀。木爲人孝友。清約能世。
其家嘗夜渡錢塘。風濤陡作。木安坐賦詩云。心與神明
合。風濤夜不驚。可以見其平生矣。

豐城縣縣丞陸文溥傳

陸溥字文博。平湖人。父鋼淳厚無競。人稱鋼佛子。溥性
端潔。好讀書。以縣學生入貲。授上海縣丞。調豐城。有廉

名屠康倍嘗贈以詩有官比江流一樣清之句嘗督運
遇采石遇夜船漏洩跪禱於天曰船中有一錢非法者
願以身葬江魚拜未畢而船漏忽止天明啟視有三魚
裹水草塞漏處人驚異之豐城士大夫有三魚記尋以
亢直失上官意棄官歸及其卒也棺衾皆貸而具焉子
橋感父事終身不食魚尤其貧以學行著

山東都轉鹽運司副使鄭信卿墓

鄭獄字信卿世爲平陽人國初從戎南京驍騎右衛因
家焉以尚書領弘治乙卯鄉薦己未登進士第授新喻

令以循良被徵授刑部主事疏乞養母改南京刑部遷
郎中出知高州府調繁南昌始至適宸濠謀逆締結權
奸氣焰薰灼莫敢誰何豪傑之流亦徃徃被其籠絡
仗忠義奮不顧身歲時宴遺一無所與其羣小不法輒
問道凡百需索峻爲拒絕意在翦其爪牙潛消逆萌穩
恨旣深遂以誣奏下獄煅煉屢瀕於死及變作猶械繫
於舟欲脅以從獄乘其怠得脫以登岸鼓舞義士且戰
且行以所獲逆徒與馬若干奔獻軍門都御史王守仁
知府伍文定相與慰勞委以原職守城因備陳賊情并

蕩平方略多見采納卒得罪人獄復撓得餘黨撫輯居民以俟其定君子謂是役也獄實與有力焉顧以介直忤當事者竟不蒙錄物論稱屈屢經勘覈久之不報獻乃自陳始末事下吏部移質大司馬遂白以聞擢河東郡轉運使值內艱歸起復改山東放舟南還以疾卒年五十有九子男三守矩仕爲令以能稱

貴州布政使李仁仲麟

李麟字仁仲鄞人舉弘治癸丑進士授工部營繕司主事改兵部武選進本司員外郎車駕司郎中陞江西參

議恤民隱除盜賊治聲赫然正德戊辰入賀至京逆瑾招權賂遺成市或勸借貸賂瑾可得美秩以責償於民麟謝曰進退有命黷貨獵榮何爲者哉時郡縣承風科歛旗校偵事交馳於道一不爲意竟忤瑾罰米九百石瑾敗乃釋時寧藩恃勢凌傲鎮巡以下無不折節而麟卒不爲屈陞廣東按察副使勅董學政愛歸服闋補貴州按察副使陞四川叅政署司事時有巨璫奉命迎佛還自成都勢張甚所至科擾無算麟絕無餽遺省費巨萬陞貴州按察使晉左布政引年以歸杜門掩跡時

釋詩文非公事未嘗一詣郡縣士友遇從者談論今古
低昂可否一不以情徇鄉黨皆宗之所著有心齋稿六
卷藏於家

成都府知府費希明愚

子思義附

費愚字希明山陰人弘治中進士初爲廷評執法無所
撓出知成都廉靖不擾而務以法繩奸竟忤當路謫戍
放還愚平生甘清苦廬石不儲妻子恒凍餓不以爲意
成都有門人官於浙知其貧甚固請過省中宴款累日
乃微以交關意諷之愚正色曰爾乃視我爲何如人卽

日拂衣歸遂與絕交郡守延爲鄉飲大賓讀法請教
曰公刑太苛歛太急守爲面赤愚不顧也子思義精於
醫亦端慤有父風而卒無嗣人以爲天道無知云

河東轉運使馮行甫志

馮志字行甫慈谿人清方寡諧出守汝寧豪猾剽禦商
貨根窟宗藩吏懼株連請微其獄詞志不聽大開門捕
羣不逞痛治之藩府人纖纖覘伺莫之敢撓猾盜屏息
武宗南狩蹕次不常檄報所至皆儲上供物又前途賄
諸嬖寵以倖免志獨不爲怵備具簡而法不致珍異旣

取道維揚帑無虛費竟以勁直忤上官得河東轉運使
不踰年解綬歸市宅僅容膝布衣藿食道如也聞小齋
凝香靜坐杜門不與慶弔不履公府有巡按來自汝寧
其父老病之曰爲我好酬馮大夫比至浙敦請至會城
恩有以厚之卒謝不往巡按行縣特爲登堂致父老之
意志性耽圖史得佳書佳句如良田美稼以此終其身
兵科給事中牧時庸相

叙相字時庸餘姚人少受業於王尚書華華器異之妻
以女弟令與文成同學弘治己未遂與文成同舉進士

授南京兵科給事中時逆瑾擅權流毒朝野相偕給事中戴銑疏其不法數十事忤旨械繫赴京廷杖九十絕而復甦下錦衣獄時文成爲刑部主事上疏申救并得罪繫獄三月相褫職爲民文成謫龍場驛驛丞相歸而孝養父母課子授徒每囊殮不具處之泰然惟聞民間有利病事則義形於色卽走白有司行罷之非是杜門不出也瑾誅詔復其官尋遷廣西叅議除書至而相已卒年僅四十有六

工部主事李二清滄

李滄字一清永康人登正德戊辰進士授南京工部營繕司主事嘗差督甃儀真及司榷龍江關廉慎有爲人不敢干以私雖中官同事者亦嚴憚之公暇輒與崑山魏校永豐夏尚朴講學窮理以求履聖賢之域一切世務泊如也卒於官賣所乘馬乃克歛鄉人高其風操率私錢爲樹坊以表之楓山章先生題其額曰清修吉士

四川布政司叅議顧尚誠正

顧正字尚誠海鹽人弘治壬戌登進士授兵部主事陞刑部員外轉郎中時逆瑾擅政用法者稍有低昂輒爲

窘辱雲南司按隸郝甸訟獄尤繁正剖決如流情罪允
當未幾歸省有海寧周邦被誣人命懷千金求解正視
其招由曰此必脫無煩以貨也却其金同邑馬惟岳所
行多不法直指使廉得之檄縣捕置之獄惟岳懼啖正
隣密懷金求救正峻拒之旦日適直指過訪正曰若馬
惟岳真巨惡也竟伏其辜邑中惡少無不洒心從善者
兩廣巡守非人地方騷動詔擇素有風力者大司寇首
疏正名奉勅往律以正法執奏稱旨公論翕然歸之權
四川叅議時白水夷人爭襲構兵正卽繕城撫諭卒不

兵而靖。肅皇帝登極，賁捧入賀，便道歸，以微疾弗起。未替，朝廷重難白水之功，有白金文綺之賜，方擬暖擢，而正死矣。正生平孝友樂易，不立崖岸，至勢利所值，確乎不少遷就，值不酬能以倜傥也。居官二十年，屋圯不能修，家產益落，至不比數於中人，亦足徵其清撙矣。

左都御史屠安卿僑

屠僑字安卿，鄞人。舉正德辛未進士，以才試御史。出按居庸時，武廟欲得生虎，命僑捕之。使者日數輩織織於道，僑抗疏曰：「此猛獸也，擒之必櫻其爪牙，陛下欲取。」

一時玩奈何不惜民命乎且非萬乘所宜近語甚切其事遂寢於是屠御史直聲聞天下改按江西寧庶人有異志輦金寶結中外獨憚僑乃陰使鎮守畢真齎重裝自浙餽之僑先事覺堅拒不受至則與都御史孫燧深相結期共圖之會父喪去寧庶人卒敗再起適肅皇帝登極益慷慨思見其奇首疏請日視朝接羣臣親賢圖治聲望隆起爲當道所忌出知保定府調延平久之擢山西叅政遷山東按察使晉廣東右布政尋轉福建左四官咸有惠政尤以廉率下爲左使入覲不持一物

諸計吏亦無敢取者遷光祿大理二卿拜刑部右侍郎
轉左尋拜南京刑部尚書改都察院左都御史秩滿加
太子太保僑清節直聲發聞最蚤比登八座年老矣世
態體局逐日以異而僑始終一致不爲毫髮少變其初
計聞上憫其贈謚喪葬悉如制其後欲用都御史輒
曰得如屠僑否其簡在上心有如此

刑部尚書何巨卿鰲

何鰲字巨卿工部尚書太子少保詔之子也生而穎異
絕倫父子間自爲師友正德癸酉舉於鄉丁丑成進士

第授刑部主事、屬員外郎郎中、旅諫

武宗南巡以忠

諫稱嘉靖初、議禮忤旨、杖闕下、直聲震於朝野、擢湖廣按察司僉事、遷四川布政司叅議、值歲飢、出廩粟設法以賑貧民、全活甚衆、播州夷警所司土官、單使往招、不煩兵而定、陞山東按察司副使、兵備徐州、計口受俸、委其餘於官以給軍費、黜賊罪吏無所徇、百姓有廉幹不阿之謠、連丁內舛艱、起除陝西潼關兵備、歷江西河南藩臬使、並以能稱、拜都察院右副都御史、巡撫山東、爲當事者所嫉、左遷福建叅議、姦者敗、召爲應天府丞、尋

復右副都御史總督漕運陞南京刑部右侍郎進尚書致仕四年而卒計聞賜祭二壇贈太子少保詔有母終其葬事鰲由郎署發聞年除歲遷以至六列掌邦禁當是時上在位久熟於法比與人情之微暖鰲惟解燒畫一不爲煩苛諸所獻決受成命而已然清德重望爲天下所歸去時上凡三留之朝紳以爲寵性儉樸居嘗不欲裂一帛爲衣至周親族孤貧則無所恤兄弟四人處之皆有恩意官保旣沒事繼母郭夫人尤以孝聞

刑部右侍郎王景昭啟

王啟字景昭黃岩人祖欽舉進士奉養誠孝父松母鄭氏無子娶妻黃氏初歸時雙鯉躍於岸衆以爲祥後益生啟幼穎異書史過目不忘年十六家貧無應門者其父命執遞餽役偶失誤當笞縣令鄭達明恕人也見其氣貌不類凡兒心疑之問爲誰家子故以祖父對又問爾何業啟以讀書對面試以文立就鄭亟歎賞令罷役收而教之比三年領成化丙午鄉薦丁未成進士時猶未婚告歸娶鄉里以爲榮初知霍丘縣勤政惠民梅慎不苟有兄弟爭財者訟不息啟以宋人所著兄弟吟令

誦之使朝夕相對。立廳事。久之。乃候議其所爭而退。選
拜南道御史。考滿陞江西按察司僉事。進副使。先是。以
事觸劉瑾怒。遂降廣西容縣知縣。謝文肅嘗贈以詩。有
不挫心藏國士風之句。瑾敗。起知蓬州。擢南雄府知府。
歷官藩臬。晉都察院右都御史。巡撫雲南。雲南地雜華
夷。號爲難治。故輯綏有方。人賴以安。陞刑部右侍郎。以
大獄免官歸。未嘗有幾微怨懟意。日事田園。閉戶著書。
足跡不至公府。故器貌魁偉。虬髯星目。心地坦夷。不矜
小節。與人語。真率無防。矜不肯隨俗。非好惡以亂是非。

性好著述，然不甚刻意。平生飲食衣服粗糲如野人。所著有周易傳疏、周禮疏義、大學稽古衍義、赤城會通記、尊鄉續錄、撫滇朔華錄、元鑑年統等書，藏於家。

山西按察僉事孫朝信壘

孫壘字朝信，平湖人。正德戊辰進士，初授興化縣知縣。四年陞揚州府同知，轉南京宗人府經歷。居艱起復，陞山東按察司僉事，提督京畿屯餉，調雲南僉事，坐撫按搆怨，奏逮。二司時壘已陞山西參議矣，仍落山西僉事。無何人觀以年老罷歸，前後仕途二十八年，歸十年而

清正

卷之三十七

主

光緒

卒年七十有一。璽爲人寬厚持重。內剛而外和。其所至。官不擇劇易。不計利害。智巧所避。毅然任之。其有蹉跌。亦不悔。自爲令時。卽力莢大豪。及在薊州。洱海。大同。佳。德。盜賊蠻夷。反側兵戈之間。而勘皇駐地土。則尤以一文吏。與貂璫肺腑。爭氣力上下。璽處之。未嘗不辦。竟以不能俯仰。故不至大官。自知縣徒同知。自同知。徒經歷也。亦坐不能曲事鄉大夫之有力者。故卒爲所擠。尤不喜通權貴人。爲山東僉事時。以屯田居京師。久之。張永嘉爲相。故交也。而同年桂萼爲冢宰。未嘗一私伺其門。

以是往往齟齬於世至其清修之節則人亦不得而窺也平生自俸資外無所取卒之日篋笥敝衣而已性尤喜詩自罷歸居閒則詩益多有雲山屢歷稿藏於家

會都御史王叔在璣

王璣字叔在衛之西安人正德己丑進士拜兵科給事中值聖駕親耕籍田上言耕籍實務四事璣起書生論時政準古酌今論者以爲鑒鑒可行至請分內閣重權以防壅蔽尤人所不敢言時烏思藏昆葛鎮南扎叭等國乞襲大乘法王號貢年例方物外私進鍍金無量

佛一軀及舍利十顆。璣復上言宜酌處外夷貢物。明好惡訓華夷以垂法萬世。辭嚴義正。至引唐宋爲比。識者韙之。補山東按察司僉事。兵備武定等處。遷江右布政司右叅議。歲歉民飢。羣不逞乘機弄兵。白晝殺人。省城震動。璣撫其情。先出諭以安脅從。擒首禍。擅殺者置於法。餘悉解散。轉山東副使。兵備天津。天津介通滄。職專郵傳舊蒞此者。惟應接賓客。批答夫關之。不暇。璣至。亟請於撫按。委賢有司一員以董其事。因得專詰兵刑。至冷邊衛之。沿河皆屯所。無有司。奸人悉駕小舟。假名貿

塩實窺便攘劫被害者奔訴無從莫之指實璣爲籍其
船於官令船尾各畫一會以相識別許徑指其船會以
訴盜無弗得河道肅清維丁內外艱起復補任徐州兵
備陞福建左叅議晉都察院右都御史克淮徐兗州等
處招撫管田使璣以久次驟更要職權貴欲市恩援附
附已璣恪守初志不少徇或勸璣少貶者璣不顧權以
書幣修謝撫屬五府三州久罹災歉千里爲餘璣目擊
時艱盡瘁不恤悉心招徠簡任治農官吏經處農事牛
具種子用力開荒者立約寬假以三歲爲期於是流民

復業者爲戶一萬二千八百有奇爲口四萬二千九百有奇所墾田地八千頃有奇凡歷再期漸就緒而河水連溢以言官論罷歸比歸一意欲退世務悉屏去嘗曰吾平生無大過人者惟是出處分明不曾少有降屈耳初仕瑣闕以不附時宰外補歷任藩臬同列多所嚴憚撫按無加禮議論侃侃若不知有薦劾權在天津日胡總制守中勢烜赫他兵臬皆曲意趨附璣獨守正不屈守中敗附者獲罪咸下璣訊治璣因自戲曰使我與衆同流何人作問官乎璣三十九登科四十筮仕五十居

憂六十再出出四年乃歸逍遙林下復十年以死死之日無餘財克殫歛費爲文平實有理致類其爲人所著有在菴遺稿藏於家

監察御史黃夢弼傳

黃傅字夢弼金華之純孝鄉人生而穎慧讀書過目輒成誦比長從楓山先生游遂潛心義理之學以名節自礪舉弘治庚戌進士授江陰令江陰稱難治傅興學校禮威強梗惠善良精敏稱神明秩滿當遷民相率伏闕奏留之又三年拜監察御史朝貴聞其風裁相戒歛避

不久以疾歸疾劇無貲以殯家人尤之傳笑而賦曰
病餐羨藿神尤壯卧死溪山鬼亦清所著有白露集及
江陰志鄭北園瑤贊其像曰嗚呼夢弼問世之英皎皎
玉樹貌癯而清氣豪不放学博能精志剛而大行方面
成心胸開豁貧富不足索其慮眼界分明邪正不能遁
其情文章之技殆將騁飛黃於班馬而義理之學尋流
討源亦歛上邇乎永程惜乎壽年不永惜不遂其生平
長洲縣知縣鄭溫卿瑤

鄭瑤字溫卿蘭谿人弘治庚戌進士初授鄒平縣知縣

值歲歉，檄請官銀萬餘兩，割截而散之。閱下計地限日，至者卽給。給者皆靡民賴以活。歲復大旱，徒跣以禱雨。隨注年書大有，辨諸疑獄，立解隣邑多就質之，以治行第一。調繁長洲，至則遇事英發，執法不少依阿。權勢殊不便，乃相構以蜚語而雄倖之命下矣。雍浩然納祿以歸。旣歸，力供子職，曲友其弟以悅親心。旦夕藜羹不具，而赴人之急。若有餘。世父與叔父爭財而訟出，金踞泣以解邑人。徐崇英爲童子師，卒於廣雍，以應聘至而收其遺骸，密置衣笥中，以歸付其子。蔡清子存微過蘭母。

弟在舟病且革，從其篋室而館之殯之，人尤以爲難。平生無他嗜好，惟積書數萬卷，無間寒暑晝夜讀之，表必標題旁必點抹，欣然有得，得必書之，不苦構思，惟意之所至，則伸紙迅筆，然務皆切於世教，不苟作也。所著有綱目撮要補遺、道德陰符正解、禮儀纂通訓子孫有鴻跡、鷺音二錄，平生所爲詩文復集爲若干卷，曰蛙鳴集，藏於家。

右都御史車秉文純

車純字秉文，上虞人。正德中進士，授工部主事。嘉靖初，

議大禮忤旨廷杖久之擢山西布政司叅議遷福建
布政司使捧持愈勵閩中人有車布不取金之謠進右
副都御史巡撫湖廣一以安靜節省爲政民甚德之已
而三疏乞歸瀕行士民遮道留車不得前純歷官四紀
清介如一日歸田二十年布衣蔬食不異寒暖未嘗以
一刺謁公府客至岸幘延欸劇談天下事亶亶不倦爲
一時表儀卒年八十有九

尚寶司卿劉伯雨滂

劉滂字伯雨鄞人由進士歷官禮部儀制司郎中綜理

嚴密人不敢干以私吏胥有犯雖解由不貸同邑沈廷
評光大忤朱寧下獄欲置之死滂周旋調護得無恙宸
濤國復護衛兵以樹爪牙滂謂漸不可長劾之濤乃鑄
黃金爲象戲白金一千兩密遺滂以結惟滂怒輒下令
各兵馬司逐捕之竄以去滇南守臣襲爵以百金爲贄
竣却之不受崇德胡某者服役中官賂滂千金求爲孝
子滂笑曰豈有失身閹豎而得爲孝乎其人愧而走歲
時表箋護絹由積先是多私爲家人用或告之滂曰路
馬之芻不蹤况表箋所餘耶以爲資陞南京尚寶司卿

便道還家，感疾而卒。卒無以爲歛，嘗所積諸書及故衣始克襄事，人服其清。

廣東提學副使蕭子雝鳴鳳

蕭鳴鳳，字子雝，山陰人。童時卽奇穎，占對賦詩，出語驚人。弱冠鄉試第一，尋舉進士，授御史。屢疏劾總兵江彬，申救副使胡世寧，皆人所不敢言。出巡山海諸關，邊吏悚懾，有傳。武宗將出捕虎，乃抗疏言：「陛下不當賤民命而貴異物玩細娛而忘遠圖。」因及總鎮以下，遞相指劾之狀，留中不報。嘗疾馳黃花鎮，啟視倉糧，其礫居半。

且侵寇累鉅萬守將盡論如法時巨璫溫祥在司禮監有權令二倖折簡爲請鳴鳳併逮二倖治之邊境肅然士始獲伸先是權貴人多冒奪士卒首功前御史盡爲紀驗鳴鳳悉奏革之權貴人雖切齒顧無隙可乘尋乞歸嘗踰年起督學南畿至則飭科條絕請託其校士必以行檢爲高下不徒以文士亦凜凜不敢犯南中有陳泰山蕭北斗之譴陳謂先提學陳公選也遷河南按察副使仍督學政凡所注措一如南畿當軸者有所囑不得行嗾言者劾其過刻無待士禮遂得調當軸者去位

役督學廣東其秉公持正曾不以摧挫少阻然竟齟齬弗達而鳴鳳亦倦遊矣遂歸家徒四壁不問生計華亭徐少師階其拔士也視學過越造其廬鳴鳳已寢疾見之第曰子升勉之華亭亦唯唯執弟子禮唯謹其能以師道自重如此歿後三十年武進薛應旂自負少許可來視學獨表其墓祀之鄉賢所著有靜菴文錄詩錄教錄杜詩註凡若干卷

南雄府知府張德卿徵

張徽字德卿嘉興人正德辛巳進士嘉靖初授大理評

事時有妻扼夫吭垂絕者。憤妻救自盡。坐妾死。徽因
欲救夫。非欲殺妻也。又一少年亂隣婦。以母切責。故絕
不與通。婦志恨死。少年抵罪。徽曰。致死不以奸法。安得
死。竟兩釋之。時論以爲平。議大禮。忤 旨。廷杖。尋復其
官。進寺副。奉命慮囚。雲貴釋殊死以下百三十人。奏中
進寺正。擢守南雄。多惠政。民戴之如父母。獨以執古。不
能浮沉取容。有違當路。罷免。比歸。杜門却執。不以干祿
入公府。雖蓁蕪不移。而意氣浩然。日以詩書自娛。優游
林下者。十七年而後卒。

晉江縣知縣張文宿

張文宿仁和人。家貧好學。博涉墳典。工古文辭。稅苑稱爲飛將。膺正德八年鄉薦。屢上春官不第。謁選授晉江縣知縣。明允信決。黎民畏服。獨以風撝孤致見銜繙紳。遭讒落職歸。文宿賦性奇偉。出言譴正。駐紬流俗。非其人。一言不與交。義之所在。堅僻自持。雖刀斧當前。不能奪也。雖窮約終身而超然不易其恭。士論重之。

福建按察僉事沈伯元弘道

沈弘道字伯元。會稽人。正德間進士。授刑部主事。決獄

稱平、嘗偶囚人繫、作圜圖、賦讀者悲之、武廟將南還、道上書抗止、遂被譴、迨世廟入繼大統、首陳治道八事、丁內艱去、服闋、進員外郎、繼遷福建僉事、卒於官、家居時絕無私謁、唯鄉邦利病所關、則侃侃言之、有司獨加敬禮、言無不從、且念其貧、欲周之、乃令所擬死大豪石某者、能致道書、則免死、豪憚道謀於道子、伺道出、陳所賂千金於几、冀以動之、道歸、問所從來、遽叱去、豪竟杖死、其清操不媿屋漏如此、平生好學、晚述作、所著有樵問、洪範八十一席、太玄論、凭几論、冲穆稿等書、

監察御史俞汝成集

俞集字汝成，新昌人。正德中進士，知長洲，首除羨銀千餘兩，節愛多惠政。召拜監察御史，屢抗疏彈擊權倖，朝廷肅然。已而出按河南，平黠寇，恤飢民，諄所講畫，皆有稱於時。集爲人耿介，磊落卒之日，家無私藏，其風節可表於鄉國云。所著有西行贅錄、隨筆錄、中州巡稿、奏議雜稿、旗風詩集。

貴州按察副使諸揚伯解

子夏孫鍾附

諸儒字揚伯，嘉興人。正德丁丑進士，初令黃梅，善撫字。

推抑豪強小民咸悅外艱服闋補大名因俗爲治他時
大行陞刑部主事歷員外郎擢福建僉事屯政修舉轉
貴州叅議貴土官遇上官至輒有餽餽悉却之安宣慰
大酋也故事承廕者必先行貨於所司乃敢請偏廉知
之卽爲刑牒安氏不費一錢而儼然襲居其官二年晉
副使持法懸平吏民畏懷至有繪像祀於家者未幾移
疾歸角巾里第飲人以和至有非理相干則慨然見於
色卽久要夙契竟終絕之不顧性尤嚴於取予自一介
之微未嘗玩而染之故歷官二十五年囊橐蕭然無長

物其子夏甘貧樂道嫻詩文孫錫爲博士有清白家風
南昌通判劉敬宗

劉敬宗錢塘人正德十四年鄉舉仕至南昌通判行誼
任真中無底裏甘貧仕學博綜羣書爲諸生已有聞譽
晚授令長愛民如子惟恐傷之以不諸上官投劾歸養
食每不足處之泰然太守陳仕賢高其行買宅居之敬
宗大署一聯於門曰入門見童子淒涼之色足覩其窮
登堂聞主人迂濶之談當賞其達許右使應元嘗稱之
曰敬宗高懷雅度超然於塵垢之表立而望之停停如

野雀之在雞羣也安得不爲名士

南寧府知府盛源之瀧

盛瀧字源之蕭山人正德中進士初知臨淮終南寧府
爲政嚴明一毫無所染謝事歸行李蕭然唯杜門讀書
不入城府臨淮人久而愈思之有爲御史以巡歷按
者知其體物不縱延之人省飲款甚洽然終無所言
巨商敗法當戍携千金因瀧予以請瀧正色却之予
泣曰大人忍坐視兒媳輩飢寒以死邪瀧曰吾誓不以
飢寒易晚節子長號還商人金去父子卒相與甘困

概蓋其事與費恩相類越中人稱清白吏必曰費成鄆
盛南寧云

淮安府通判王本源汾

王汾字本源慈谿人賦性誠慈奉行不欺茹苦談經無
廢寒暑舉鄉貢爲歙縣教諭聘主考湖廣鹿鳴歌罷翻
然歸舟諸餽物悉不受監臨爲移文巡按必致其儀巡
按以爲不辱所舉薦之陟南豐令監司待之倨輒詣府
乞休時寧海王度爲守亦峭直不阿強留之及覲期遽
稱病篤歸例當黜罷而當道重其廉直竟不罷陞淮安

府通判離院委掣鹽徽商以千金進叱之行縣督稅縣吏以常例進不納既而令因元旦進謁使吏潛投案下而出汾得之亟閉門捕吏令懼請罪汾慰之曰吾忍汚君以賁庶邪徐伺令出物而去在淮閱歲竟浩然歸妻孥子不免飢寒不顧也甘節而貞君子以爲難

南昌府知府鍾彥材梁

鍾梁字彥材萬安丞海之子也初海丞懷遠時葺禹祠感夢而生梁幼稟夙慧七歲通毛詩九歲補邑博弟子員正德庚午領鄉薦甲戌登進士第授刑部主事歷員

外郎郎中司刑七年勤慎精密獄無冤滯武廟徽行
叩馬諫杖闕下幾死已而拜肅皇帝命錄囚南畿至
通州有致黃金求減死於暮夜者梁邵其金按之法京
師有伯起齊名之譽擢山東濟南府太守濟南爲山東
劇郡號難治梁庶明慈惠吏畏民懷治爲諸郡最時莖
蕪邵志作亂破城邑梁察機豫防籌畫精敏徂徠戰績
多出指授臺臣以聞詔賜金幣任朞月卽乞休得特歸
養嘉靖己丑以薦復拜南昌守以患肺病劇遂致仕歸
梁長材達識偉度豐願望之爲公輔器急流勇退林壑

徜徉與騷人韵士更歌互答絕口不談公家之事嘗作
四詩以述平生曰貧不屈身仕不易節隱不干譽老不
妄求無何得脾疾諸子遑遑醫藥梁邵勿御語諸子曰
吾反躬內省庶幾不疾此正歸全之時何以藥爲吾亟
見士大夫臨終有畜以遺子孫我素居官無所利居鄉
無所囑惟有憂勤惕勵四字勉爾輩以立身立家爲能
白史子孫所遺不既多耶遂自志其墓系之以銘曰彼
丈夫者沉酣六經卑視屈賈文章典刑彼丈夫者一鉅
千里叱咤風雲邦國經紀惟予小子形體不殊焉乘之

力竭延之濡進德未逮惟日夜孜孜生無可稱死有餘責
知我志者尚有此石卒年八十有二

江西按察使謝國正汝儀

謝汝儀字國正鄞人生而凝重沉毅力學不懈孝友篤
至自幼鞠於祖母慈慕尤切登正德甲戌進士授餘干
縣知縣縣當孔道商稅不貲慮出入無藝立計簿稽盈
縮額外不入一錢時中貴監督茶稅聲勢薰灼汝儀棘
棘不少阿迄不得肆其暴以外艱去服闋擢監察御史
遇事敢言以直稱尋督直隸三省馬政已又巡按廣西

亟於殄寇安民而制馭程種區畫精詳殄恩恩之寇得
岑猛之變尤其大者上疏乞寬假議禮諸臣請誅巨瑄
谷大用等首觸忌諱人爲惴惴陞按察僉事兵備嶺東
擒大盜魯蛇仔轉兵備漳南設防海四策時流賊李良
武輩聞風解散海道肅清進巡海副使陞雲南叅政下
車搜剔奸蠹十餘事築尋甸嵩明二城至今賴其保障
遷江西按察使便道歸省適祖母疾卒汝儀過於哀毀
遂以不勝喪死汝儀平生峻整終日斬斬自持對親愛
未嘗輕有笑語至道義孚契卽膠結不能解衆中默默

若無所臧否及遇大事臨大患壁立萬仞毅然不可犯
比死竟不能償宿逋家無以爲養知與不知咸痛惜云
鎮江府知府陳德卿文譽

陳文譽字德卿慈谿人性謙和孝友聘妻馮氏病父母
欲改卜固辭曰古人有娶瞽女者奈何弃之卒結褵妻
早世竟以有子不再娶舉正德癸未進士初授刑部主
事論囚南畿決富豪之死獄萬口稱快稍遷員外郎節
中審錄江西多所平反大學士楊一清被誣下法司嚴
治諸曹難之文譽厲色曰顧事實不實耳何愛於楊公

何畏於內府事，竟得理出，知鎮江府。杜請託，輕錮役，五邑之內，百姓晏然。以忤當道，罷免居林下。清介不渝。有同年爲建溪御史，令有司以牌坊價遺之，辭曰：「吾爲官一介不取，乃取償於鄉人耶？」竟却之。

工部員外郎徐成孚用光

子學聚附

徐用光字成孚，蘭谿人。孝廉袍之子。少承家學，得窺聖賢之微。居父憂，哀毀嘔血，成痼疾。孤貧事母及大母畢力。叔水能使二母忘其貧。已酉魁鄉薦，明年捷南宮，乃歸。嘗父母葬，癸丑始與廷對，以二甲進士授工部都水

司主事陞營繕司員外郎督臨清磚廠兼治河道會河
淤梁家鄉且百里害漕議者謂宜上聞頂大徵發乃辦
用光笑曰事在然肩而千里望救非計也且吾力足以
任何事更煩縣官乃捐公帑之美召募疏濬不決月告
成事漕舟畢達州守某食人也負輿援張甚以事逮窰
戶張欽索重賂不得篋殺之用光上狀請諭治卒戍遣
食守以去津要有欲爲守地者畏用光詞強不敢奪故
事窰買發金錢數十萬割其贏以佐公費用光一切謝
絕之未幾遷屯田郎中以代去州民皆泣送百里外道

病行李蕭然有寄戶素德用光者夜懷金爲湯藥費厠
光彪然屬聲指所衣白衣曰我瑩潔如此衣爾奈何輕
以墨汚之亟持去不數日而卒年僅三十有五用光性
高簡平生不問家產食貧力學無廢寒煖舉南官後居
家三年足跡不到公府比爲郎年未及壯潔已卓有定
識蓋學之於人大矣清源德政碑有烈火真金之譽聞
者以爲實錄所著有徐工部詩集以子學聚貴贈通奉
大夫福建右布政使子學聚字敬輿萬曆癸未進士初
令浮梁以才調繁吉水六年考最召授禮科給事中

論奏多關大體以疏救李豐城觸當路諱黜爲長沙令
事移西江糧儲陞福建右布政使推擇擬晉中丞俞旨
未下而奸民吳建者窺兩臺虛無人遂潛糾白蓮教數
千人部署已定刻期舉發學聚偵知之慨然曰事不避
難臣子之義可以兵未在手爲解耶遂出奇計擒吳建
梟其頭黨與解散不動隻矢而七閩安堵事聞加俸二
級賜白金文綺已填撫命下晉都察院副都御史與當
路不合遂投劾歸

臨江府知府錢公良琦

子芹萱附

錢琦字公良海鹽人生而端毅嗜學下帷十年衣不解帶遂博極羣書聞祝虛齋先生講道海昌偕同志吳邦從之游學益粹而精敏不衰成正德戊辰進士初知盱眙值歲旱蝗步禱郊壇下雨應如澍而蝗皆赴水死歲以大熟時流賊齊彥明等擁衆十餘萬屠城破邑所過流血聲言旦夕渡淮官吏望風而遁無敢禦其鋒盱眙當賊衝樓櫓備禦無足恃者琦奮然以死守自誓召邑中父老子弟諭以國恩戚感泣受約束於是簡驍勇立營堡移檄淮南諸郡縣合力死守犄角爲聲援得賊偵

卽斬以徇旗幟一新時吳昂方錄張巡守睢陽詩以遺之且曰平生學力正在今日琦報曰業遣婦子南還而以身許肝胎矣賊知有備不敢以一矢相加諸郡縣悉安堵無何擢南京刑部主事便道過謁虛齋先生先生勞之曰守肝胎良苦琦謝曰吳子之教也論者重其不伐會武宗南狩琦上疏力諫其略曰陛下宜以宗廟社稷爲念不宜狎信佞臣輕身遠狩以動搖根本驛騷海宇不報遂移疾歸尋起南禮部祠祭司郎中復改刑部時張永嘉方爭大禮欲得助已者乃出疏示琦請署

名琦固卻曰此自有諸公建明聖天子獨斷且琦不
足以當知禮無煩子事永嘉乃與桂夢連名上之驟得
華鰲矣而琦出守臨江弗悔也比任務持大體與民休
息不爲刻覈苛察之政以新淦地遠藂菁曼衍爲嘯聚
藪請析置峽江縣城社具舉井伍臚列自是流竄之民
藉樂利而爲善良會當峻擢而過客惡其簡也爲蜚語
中之竟移貴之恩南遂上疏乞身歸脩然三徑日事
吟時吳昂亦挂冠兩人相得甚驩結耆英詩社更相唱
和足不人城市諸貴人造請多不報建家廟制祭器立

義田以贍族人、每月朔聚鄉之長者讀、皇祖聖訓以教鄉之子弟、撫臣雖交章論薦、琦卧弗應也、子片湖廣永州知府、子萱禮部儀制司郎中、冠蓋相接而琦身自貶損、諸子益醇謹、有萬石君家風、年八十二卒、所著有臨江集十六卷、測語四卷、大司馬王世貞論之曰、習公詩若文者、見以爲才士、誦南曹疏者、見以爲直臣、考臨江肝貽政者、見以爲循吏、乃稽鄉評者、見以爲善人、君子然、竟莫能以一端名公、而公亦淵然不欲以名自顯、真知公者矣、

工部郎中姜幼章綱

姜綱字幼章，大理司務芳之子。性剛介，力持古道。出進士，授南刑部主事。識議詳明，時以爲老吏不如。嘗請除方遜志、奴籍理高介夫冤獄，尤爲卓越。以議大禮與時宰異，獨立不阿。時呂涇野官武選，一旦於稠衆中問及同鄉能詩文者，綱不應。呂前席復問，答曰：「德行本也，詩文末也。本之則無如之何。」呂改容謝之。轉工部營繕司郎中，剔蠹斥奸，爲吏卒所憾，共誣以擅用官物。下錦衣獄，尋得白，落職歸家。居澹泊自守，不預外事，亦不以營

家爲念。自號方竹。嘗爲之讚曰。方不就曲。竹不諧俗。知我罪我。方竹方竹。所著有鳳林類稿。經史等記若干卷。

光祿寺卿陸文東淞

陸淞字文東。平湖人。程鄉令銀之子也。四歲能誦毛詩。領弘治二年鄉薦第一。明年成進士。以祖母老乞歸。王端毅恕薦預修大明會典。成擬除翰林。力辭。授禮部主事。歷郎中。正德初。宗室多越例請乞。皆格不行。時逆瑾用事。倭使宋素卿賂瑾求數人貢。淞上疏謂素卿通番。以邀中國。漸不可長。請誅之。瑾怒。中淞他事下獄。淞不

清江

卷之三十七

書

光緒堂

爲懼累遷南京光祿寺卿懇疏引疾致仕歸淞性仁厚
與人煦嫗惟恐傷及臨大事毅然不可奪居官四十年
被服飲食如寒士清而不矯人以爲難嘗書壁以戒子
弟之仕者曰俸祿之外不可苟得患難之來不可苟避
又常語人曰士君子當立定腳根禍福自有天命尤簡
朴任真每宴客酒七行卽撤縉紳誦其古道所著有東
濱集遠游稿子四杰集集各有傳

山東布政使邵思抑銳

邵銳字思抑仁和人學本六經文思沉鬱正德戊辰舉

禮部第一改翰林院庶吉士時道瑾擅政而焦芳劉宇
深相結芳子黃與宇子仁皆爲庶吉士未幾傳旨俱授
編修銳以甲第列於仁上亦併授焉耻與爲列方具疏
辭免會伯兄欽至以危言沮之且曰以會元而得史職
非過忝也公議自在於汝何尤尋以父喪守制墮敗
詔革傳奉官亦併及之言者以去非其罪而銳竟不辯
也服闋改寧國府推官尋擢南京吏部文選司主事轉
祠部員外郎因病在告庚辰起爲江西督學僉事進福
建副使仍董學政銳溫良樂易雅志作人兩爲學使皆

以變化士習爲先。取士必先行誼。多士翕然向風。歷湖
廣。叅政河南。按察使廣東。山東。左右布政使。所至咸有
惠政。陞太僕寺卿。以病乞歸。卒年五十四。贈都察院右
副都御史。謚康僖。銳爲人謙冲。不伐。忠信直諒。篤孝於
親。姻睦宗黨。不爲皎皎之行。而倫誼克敦。其學無所不
窺。與崑山魏校相友善。貽書往復。皆聖學精微。時政機
要。不及時俗語。內行淳備。駐於近名。天下以爲真道學。
云沒之日。筭無數金。田僅百畝。身後之澤。諄諄語其子。
勿請乞也。人益高之。

真定府同知胡仁甫擇

胡擇字仁甫蘭谿人由舉人歷邵武長沙建昌三府通判陞景州知州轉真定府同知所至廉謹練達人以法家老吏稱之致政歸宦囊蕭然幾不能自給安貧樂道處之裕如平居孝友兄弟讓田有純厚之風

兵科給事中李九臯鶴鳴

兄鶴年附

李鶴鳴字九臯義烏人由進士授太常博士選吏科給事中差查內八府莊場田土嚴覈侵奪不避權貴卒爲權貴所中左遷金壇縣丞建撫侯位檄署上海縣事庭

無留訟境內肅然位削剡特薦有力任千鈞才堪八面
之語詔復原職尋陞大理寺右丞仍兼兵科右給事中
竟以剛直不容於時歸鶴鳴器識宏深才猷練達年耆
英朗天性友愛早孤受學於伯兄鶴年年撫愛甚篤訓
以義理嚴其課業俾子約拮据家政以需燈火而囊無
私畜及鶴鳴祿仕俸入亦無所私婚教諸弟侄同於已
子爲文章渾傳純雅而詞意高古詩賦清新雋麗未嘗
踴襲前人一語所著雙杉亭草十二卷

右副都御史戴時重鑑

戴鑑字時重，鄞人。舉正德丙子鄉試，丁丑成進士，授刑部河南司主事。歷員外郎，陞四川按察司僉事，整飭安綿兵備，繕樓櫓，遠斥堠，選將練兵，諭羗夷以恩信，無敢竊發者。民賴以安。先是，龍州土官多以賄結兵備，恣肆干紀，莫敢誰何。至與同餐燕，一以法束之，不少假。至縮縮不敢吐氣。當是時，議禮臣僚有被命北上者，鑿道持檄南下，遇諸臨清，欲挽鑑以語，而先解維以避。心深銜之。至是爲宰相，得君寵無兩，遂諷所司奪職。家食者八年。會時宰物故，起爲河南按察司僉事，尋轉江西參

議進副使兵備饒州以內報去起爲廣西內江兵備職
徃徃嘯聚稱亂募府議大舉兵剿之鯨曰此何足煩大
兵特密選精銳數百命材官數輩分爲犄角授以方略
深入仙廻松林諸山砦繞出賊腹夾攻之斬首百餘級
俘其酋餘黨悉烏散江道肅清轉叅政尋陞山西按察
使振飭憲典官僚憚之嘗有巨商持宰相書來告逋負
者輒焚其書杖而遣之曰爲朝廷監司寧爲賈豎責券
耶有一知縣受賕殺人直指使知其與權貴有連特爲
釋之且言進士可惜鯨曰進士可惜一方之民命獨不

可惜耶必正法乃已。陞廣西右布政使尋改四川左以
外艱去補江西陞四川巡撫都御史所隸諸部雖羊腸
鳥道必輕車詣之問民疾苦爲之興革父老相傳以爲
撫臣旌節二百年來僅一至此也由是西省將士躍然
歸心而江西舊僚有銜驚者以飛謗傾之落職歸居三
年一日無疾而逝年六十七初驚家居見河渠不飭作
鄞水利三敘見貪人利番舶闖出無忌作海防策特以
負氣高亢不能俯首權貴又不爲同事者所喜故動見
阻抑不竟所施云遇故人必傾心接引有同舍生趙宜

者家貧不克葬其父母以所卜南郊壽域葬之又有范
瓚者以所居室質錢於縣而期滿當徙縣慰留之曰吾
寧不得屋必不使汝老而無歸也持家斬斬閭壺內外
不得輒爲笑語優伶巫祝悉屏不用居官四十年閱節
不至其門當路多嚴重之所著有東石詩文稿若干卷
陝西左叅政陸原博溥

陸溥字原博錢塘人登正德戊辰進士授兵部職方司
主事歷員外郎郎中進江西布政司左叅議遷陝西左
溥之官職方也逆瑾擅政流賊四竊於齊魯趙衛而逆

鍾起寧夏職方稱難溥因事籌畫動中機要司馬卿倚
如左右手瑾誅以瑾連坐者數千人溥白於上悉原
之尋奉勅覈京營諸兵馬素遮於豪右懸其籍溥乃盡
括之着伍豪右歛手謝然竊銜之已武廟南巡溥與
諸省郎伏闕乞留不報肅皇帝登極詔復先朝爭臣
賜俸一級其恭藩江右也淦有負固者號召至千人將
爲亂巡撫都御史以兵事屬溥溥出奇兵掩擊之不旬
日而縛數百人以歸割其地爲峽江縣迄今無反側時
吏部以薦擬按察副使請不報凡請者四面四不報繼

又以薦以奉政請不報亦四請而四不報久之始有陝西之命或曰銜者中傷之也溥不以爲然志節愈勵單車赴任至靈寶忽一疾卒溥生平仁恕而樂易不求異於人而人自不及故人樂與之至與權貴交屹然不可犯卒以此齟齬不達靡悔也卒年四十有五

南京通政司右通政余子華本

余本字子華鄞人少游府庠斤斤自持不少刻鵠角正德庚午領鄉薦辛未廷對擢進士第二授翰林院編修充經筵講官時權奸迭興文事廢不用本慨然具疏指

切無所忌。至再上不報。乃乞補近地儒學官。便祿養。當道難之。乃請提廣東按察司副使。提督學校。至則毅然以釐俗作士爲己任。秉公力勤。務行厥志。然素性骯髒。視卑陬囁嚅之態。不啻若臭穢。行事一不當於理。卽義形於色。或面折不少容。用是與巡按御史毛鳳積不相能。劾其不法數事。而毛遂肆其莠言。以相詆誣。詔各回籍聽勘。鳳尋以京考落職。而本適羅外艱。服除。當道促赴選。本不可。未幾起復山東按察督學如故。其行事不改嶺南。陞南京通政司右通政。凡文牒無細大一一訊

辨擇可否罷行之曰不爾則無以遏讒說距殄行非朝廷設官意也無何而以疾卒年僅四十有八本見義必爲於得喪是非死生禍福不一置於懷故能無所瞻顧若鷹攫瀾趨莫或牽掣家居食貧稱貸無虛日親族有急輒傾囊以濟之於書無所不讀禮樂天文陰陽律呂皆研窮其數爲詩文直寫已意不屑磨鍛崇華飾作世俗語而典雅確實克裨世教其雄才大節使當大任爲國家長城太阿無疑而遽止於此知者惜之

光祿寺少卿金信夫廷瑞

金廷瑞字信夫錢塘人登正德己丑進士第除泰州知州擢營繕司員外郎未幾以議禮杖闕下稍進與衡司郎中等改營繕丁內艱復補原官用九廟旁食四品祿出知鎮江府有詔改京秩拜光祿寺少卿加賜白金文綺亡何爲嫉者所構免歸後三年山陵工起上顧左右問金廷瑞安在蓋將進用或詭對以沮之不果召瑞之爲太宰多善政獨不便豪右豪右爲毀言問當道當道愈欲借毀不行初毅皇帝之南狩也道出淮南寶應與泰隣供億不貲非嚴幹吏不足任撫臣遂以委

瑞亡不立辦者會久雨湖決諸臣懼罪計不知所出瑞
徐行視曰不足憂也隋林捷石鑿火夜作而隄塞龍
舟獲濟中人法外需索不得欲困瑞夜分傳詔曰上
將矢魚趁具網瑞卽具網上亦不敵也二事非瑞不
能辦臺部使以爲木交章薦之會世廟稽古正郊
廟之制程品百工簡練曹署登才良斥窳弱而瑞以材
臣綜理盡瘁爲司空所引重然禍亦自此起矣凡將作
經費悉關內府內府會其數以牒尚書瑞裁損常十六
七以是多與中貴忤竟與構去瑞爲人溫良易直不立

崖岸亦不隨俗爲浮沉人以此愈親愛之母貞居寡悍
以色養得其惟心事伯兄多推與田宅其自奉甚儉至
周族里緩急無靳也居恒以書自娛客至奕棋呼酒對
酌夜分乃罷卒年五十有六所著有衡居雜纂一亭集
若干卷藏於家

副都御史柴季常經

子應賓附

柴經字季常鄞人正德丁丑進士授刑部主事歷員外
郎郎中陞雲南按察司僉事轉湖廣歲信並著風動三
楚歷遷貴州叅議更江西廣東四川藩臬左右使遷南

京都察院右副都御史提督操江、視院篆、兼署大理寺會法司有爲言官修故怨者文致人死罪、池州守爲前守滅仇家、且籍其貲、株連者十數輩、經皆平反之、故諸人銜入骨、因賂言官攻之、而當道者不察、竟落籍以歸、經居官介介、門無私交、自蜀陟內臺時、僚屬修故事餽、經一不受、足未厠倖門、雖親故在通顯、不一抵書、則與人交無熟語、亦無矯行、臨大事、決大疑、則侃侃、不以一言定是非、人有過、不宜有一善、卽揚之、不去其人、皆稱爲長者、子應賓仕終福寧州知州。

禮科給事中章景南道

章适字景南蘭谿人少孤事大父母曲盡孝敬比冠携其弟遠邁師名儒凌德容瀚步趨不違沉潛禮義淳如也舉進士授行人宣布上命所至行李蕭然擢禮科給事中時世宗未有倦勤意無敢言及儲君者乃慨然曰事有大於此者乎爰進講讀疏雖忤上旨而風節凜然殆人所難未幾引疾告歸竟不起家無羨儲妻然一布衣也所著有道峯集若干卷弇州山人王世貞爲之序

開封府知府沈體行光大

沈光大字體行，慈谿人。正德六年，以進士起家，授南京大理寺右評事。性剛直，精法比，守正不阿。人無冤者，父憂服除，補比，仍故官。當是時，上與諸侯倖游宴，恣其請求，不與閣部大臣接。而錢寧最暱，一切刑賞出其口。方以都督典親軍緹騎，督察中外，莫敢誰何。十二年五月，寧捕白蓮教道人艾道清等百餘人，誣以大逆，及無辜相連坐者甚衆。刑部依違，莫敢抗獄。成送大理寺議。覆光大披牘歎曰：「下民易虐，上天難欺。吾敢殺人媚人。」

邪竟坐以本律並得全活寧自謂奇功可邀上賞一旦
爲光大所抑銜之刺骨未幾寧遣校尉王宜赴寺有所
請光大不聽宣出不遜語光大杖之階下寧大怒遂
劾奏光大朴傷直廩校尉上怒逮送詔獄光大歎曰
吾守法死官下亦復何憾寧傳旨杖光大四十錮以杻
阻絕飲食欲置之死數日竟不死若有鬼神護之者時
朝論洵洵謂沈評事不過爲國家守法耳一旦斃之國
土咎將誰執寧懼禍遂送刑部擬罪刑部白光大冤狀
令還故官而寧竟矯旨削光大籍歸編氓已而宸濠以

叛逆伏誅寧以交閑亦坐死臺諫始交口訟光大守正
宜大用乃除南大理寺左評事遷寺副嘉靖初政旌直
臣擢知河南開封府時大旱歲飢老穉相枕籍死壯者
則去而爲盜光大下車惻然憫之賑其生而瘞其死旁
招商買務昂米值以與之市車運馬馱菽粟輻輳民以
不飢而盜亦相隨散去帶牛佩犢者改而事耰鋤衣襦
襖逾年遂大稔光大益導之禮讓以福其俗境內大治
俗歸淳厚顧念母年登大耋不忍以二千石易一日遂
乞身歸養卒於家新建喻均論之曰沈公以下錄旌獲

倖崎嶇行中、筆楚在前、刀鋸在後、卒之出百死得一生、而罔怨尤人、猶以感激疑之、既遭聖明、與大郡、德澤流於百姓、駸駸顯重矣、而乃慕李審之陳情、陋陳咸之于進、卒挂冠海上、負耒海隅、茹瓠飲水、樂而忘死、千仞高翔、飄然風德、貞哉、余故著之以戒乎世之遭邈末路者、當時以爲知言、

會都御史陸秀卿塋

陸塋字秀卿、嘉善人、潛心理學、以聖賢自期待、篤行誼、重氣節、爲文根本六經、有關世教、嘉靖丙戌登進士、初

授南京刑部主事平反訟獄與大理丞相輒白尚書奏
請詔從邨議著爲令嘗作文贈同寅時嚴嵩爲禮部所
郎見而奇之屢造邨拒不見嵩托人私詢其意邨曰此
人雖赫赫有時名實奸雄也嵩聞而銜之改兵部武庫
員外郎郎中武庫主出納諸司隸直多美金人易乾沒
邨率不改封以發清聲振一時出知常德以才調武昌
士民攀號載道尋徙岳州岳州大飢邨不待奏報發倉
廩以賑民賴以全活者數百萬計頌聲四溢時嵩柄政
銜前事十年不調御史伊敏生巡歷至府邨供奉甚簡

伊直入其衙。惟老蒼頭二人。敝篋無鎖。檢之。惟殘書數百卷。布衣數件而已。特疏薦之。時世廟勵精圖治。以吏乏循良。作青詞。醮告。是夕夢神告云。岳州有賢知府。十年不調。何謂無良牧耶。晨起。閱伊疏。大喜。卽允陞京堂。伊以薦賢陞一級。邾至。都不謁。嵩遣其同年萬生諷諭之。邾正色曰。受職公朝。拜恩私第。賢者猶不爲。況未受官而先謁。權貴乎。卒不往。官亦不補。滯京邸者三年。草疏求還。萬生知之。密報嵩。始有太僕少卿之推。進正卿。轉南京光祿寺。巡撫河南。未幾乞歸。卒之日。戒家

人勿哭語之曰全生易全歸難當淨掃思慮以完吾造化故物哭無益徒亂吾意耳時年五十有五所著有風雅輯略傳習辨疑古文詩賦藏於家

國子監監丞陳正初旅

父璉附

陳旅字正初台州臨海人父璉以詩經發解冠南省歷官翰林院檢討按察僉事提督江西廣西學政清節粹學師表一方旅承家學以明經舉爲江西新淦縣學訓導廉以律已公以率人鄉賢有死節爲人誦者首題其名於碑以示勸暇則修治學官規益縣政上下交誦

其賢擢翰林院孔目改國子學錄操履一如在新淦時
鉅無所事事而賢聲隱然出六館右遷監丞丞職雖卑
而權則重監之紀綱自祭酒而下得忝預焉旅乃首黜
解宇遺財力清宿弊律已率人益嚴而厲監規爲之肅
然吹南京國學六館之士素聞其清正望而畏之目陳
監丞承矣及署堂印遂奏請修飭廟學盡出羨餘以資
公費一無所私輸粟生與外吏遣子入學者例皆厚贄
旅一無所取顧於寮友生徒之孤貧患難者則傾橐周
給之無吝色九載秩滿卽乞休諸生請於朝曰人師難

得願再借留旅不待報翩然歸十載乃卒年八十有一

河南按察司僉事湯子雅彬

湯彬字子雅海鹽人三歲失恃事繼母以孝稱童年廢於學官博綜今古精研經術名重一時四方鼓篋從遊者戶履時滿顧偃蹇場屋者三十年嘉靖乙卯以膺貢始中順天鄉試丙辰成進士授廬江縣知縣吏畏民懷治績報最積薦至二十七章以不通分宜饋抑至五載始陞兵部職方司主事轉車駕員外郎九遷至馬廐心積歎大司馬倚以爲重時綏帥炳勢張甚人多蠲附者

彬母故陸氏於炳分當爲甥彬以家素貧賤不敢攀附
爲辭卒抗禮炳大銜之故叅將湯克寬以禦倭有功於
塩爲倖臣註誤繫詔獄以彬邑人稔其功行千金求緩
死彬毅然卻之爲自於當路具疏論救得減死立功自
贖擢河南按察司僉事河南方出伊庶人膏火彬下車
約法一切解去煩擾平亭獄訟民稱不冤巨寇李得貴
等聚衆萬餘橫行荆隨間蔓延及洛攻劫城邑殘殺官
吏中原大震彬振甲馳赴設方略擒斬六百餘人餘黨
解散中州晏然彬之力也而忌者顧以微功他省論罷

聞報欣然卽日就道所屬州邑各持贈追及於襄陽計資千餘金秋毫不受單車南下歸家足跡不入公府蕭然如寒士同年王得春以持節按部至郡聞彬貧欲稍佐其不足彬卒無所言時兩賢之彬爲人文弱然見義激昂則奮勇直前有萬人必往之勢於聲色貨利一無所嗜孜孜好施不計有無生平無燕容無衰詞表裏始終如一所著有四書心解書經精意錄行於世

廣西按察司副使錢守禮立

錢立字守禮仁和人幼而失母父食貧無以爲供讀

或諷立姑徒業立奮然曰寧儒而訕爾不願他而竊也
長老壯其志爲決筴受書成嘉靖乙丑進士授刑部主
事時海忠介瑞以言事下獄居處橐餽視遇惟謹忠介
得長繫無恙未幾調兵部武庫復改工部屯田所督厥
主薪蒸乃條上便宜七事汰冗剔蝨以肅幹聞外艱服
除授前官會有山陵之役立監將作役竣校費省他曹
十之三四費銀幣加秩一等進營繕司員外郎歷郎中
出知太平府時蕪湖無城盜剽開稅操江都御史備兵
使者並被斥檄守令期日獲盜令急執買人誣伏償亡

欲以塞責立聞。廣歎曰：是非盜，有司真盜矣。解纜之，授捕者方略，不決旬，盜盡獲。始議城蕪，立謂蕪不虞盜，盜所利，買人酬，縣當道買七民三受役，令旣在，復城成壯，乃逾他邑。考最擢廣西按察司副使，備兵永寧。永寧，僮僮地，立謂不當繩以一切，惟是蕩佚簡易，寬其小過，宜易爲治。適土夷爭田，治兵相攻，諸武吏競請剿，立不聽。檄諭以禍福，皆羅拜曰：惟公生死之，立法其一，二首難者，餘置不問。所全活無數。立故恬於仕進，自郎署典郡，意未嘗不在林壑，而會八寨議起，立不忍，戮無辜，以易。

首功與督撫爭之強遂投劾不待報歸既歸精心課子
屏跡公府獨時與二三朋舊結社湖山間晚歲兀處一
室焚香手一編不庚念是非利害顏所居曰恬老卒年
六十有三子養廉以進士官終吏部驗封司員外郎立
之卒也會稽陶太史望齡嘗狀其行有三不識之評云
與人坦直如不識世間有機穽事衣食淡非室無婢媵
篋無珍玩如不識世間有嗜好事緘默不道人過有及
人帷簿者則閉目不應如不識世間有猥雜事蓋其天
性也君子以爲確論

太常寺卿嚴汝肅大紀

嚴太紀字汝肅，餘杭人。幼英穎，父太醫，給事大內，受知世廟，以紀從。戊午舉於燕，明年成進士。時方弱冠，授大行歷宗伯郎，出僉江右憲。剔歷藩臬，長召入卿。光祿旋晉太常，予告歸。隨卒，年纔五十有二。方紀成進士，丰采表一時，分宜相風諭引爲同宗。冀黨紀，紀執不可，甚銜之。相旋敗，得不及。屆考選期，以望當得臺省，而年未及格。時時相爲座主，諭以稍益。孟陬紀又執不可，比入卿光祿會。壽陵之議起，而政府多左袒。遷大略者，上

疑之勅諸司各議係紀獨執不署致上問又有勅露
章者紀又執不可曰我實不諳堪與家言何敢妄有陳
引第上下雷同非國之福故不爲耳舉朝服其言執政
者益銜之遂厭私人接應事論奏遂拂衣歸紀居恒惴
惴若儒生而遇大事屹如山岳生死利害不能搖動未
嘗嗾口譚天下事而與職拮据不辭艱鉅所至有清節
出功如却冊封魏遺賢藩祿奇美擒晉楚劇盜定中州
亂兵戡定之烈無不咄嗟而就方在晉檢民圖溢額者
二百頃有奇衆欲增額稅紀執不可乃止以故宦轍所

經無不尸視之如畏。墨者家居孝友。有至性。事父母。務色養。貴而愈篤。從大夫後。乘輿至里門。必下。而趨宦中。遇同鄉。無問識與不識。無不引見。衣食之當。阨者必委。幽脫之。郎宗伯時。有某生。以文投贄。無所售。紀獨以爲奇。延禮給餼廩。使得畢業。再期。遂成進士。及忝江右藩。而此生儼然同官矣。一夕。厚遺稱報。堅謝不受。其爲德不見德。大都類此。沒幾三十年。薦紳士庶。猶有思而泣者。言必稱嚴太常云。

王輔右侍郎全洪德元直

全元立字汝德鄞人嘉靖乙未進士改翰林庶吉士授檢討辛丑克會試同考官所舉多名士下外艱去服除補原官滿九載考進修撰克經筵日講官癸丑復同考會試得人如初先是河套議起分宜伎督撫曾銑藩於上逮論死并潁桂溪次第辟西市舉朝冤之莫敢有言者元立憤然曰使吾職臺諫當以言爭職廷尉當以法爭吾職史獨有董狐筆在耳援筆草告天文以暴分宜橫狀比楊忠愍就辟元立益憤然益盛詆分宜訟言於朝貢諛者輒以聞分宜怒甚屬所私刺元立陰事卒無

所得遂遷寺講學士出掌南京翰林院事時宦者幸少
南曹爲散地元立獨念太孺人春秋高便省親輒欣然
就列遷南太常卿兼署光祿事陞南京工部右侍郎會
歲旱言官以故事請兩都大臣當自劾元立笑曰太孺
人老矣吾登鍾山望白雲起東海心未嘗不搖搖懸旌
也惟王父恩命未及故忍而及今度吾書生耳不復有
所樹且休矣遂抗疏乞歸上猶難其去而分宜乘間
進得旨致仕分宜謂元立所親曰爲我訊全侍郎能悉
歸田故否元立撫掌答曰乞休得休豈相尼哉爲我讀

嚴公勉旃自愛比分宜敗輿論謂元立且旦夕召乃元
立執太孺人喪竟以積毀卒元立長髯修幹丰神俊爽
望而知其爲偉人自少以簡重練達見推前輩及歟歷
既久該洽絕倫遇事輒迎刃而解時寓內北中虜南中
倭集議戰守勦操前箸而當事者故爲枘鑿卒無所見
其奇往往形之詩歌以泄其憤懣不平之氣守史官二
十年以文章爲職業宏蔚爾雅登作者之壇有集若干
卷藏於家

右詹事御史都大監

清立

卷之二十一

七

光緒堂

趙鏜字仲聲，衢之江山人。嘉靖丁未進士，選庶吉士，讀
書翰林。改授河南道御史，督長蘆鹽政。時軍興需鹽課
甚急，人謂鏜儒者，未必稱。而鏜悉心經理，尋究弊源，逾
月條上封事，皆中肯綮。老吏所不能及，會代。改應天巡
按，慎舉劾，勵風裁，諸不法事輒以柱後惠文治之，威名
大振。適南畿學政缺，天子以鏜才，命董其事。是壬子
四月中旬也。棘闈期迫，就試者不下萬餘人，而分宜相
方擅朝政，士之黃緣干請者，一切峻絕之，不爲動。明年
按江南，益矢虔慎，所拔多一貴之儔。如申相公時行，許

相公國王相公錫爵皆鏜所深契而首錄之者也其他
布列中外展采錯事者不可勝數蓋督學官之得士未
有如鏜多者無何引疾歸仍補河南道擢順天府府丞
攝尹事改大理少卿聞父喪輒不御酒肉晨夜馳還苦
塊哀毀骨立服闕除謄黃通政未任會都察院缺右僉
都御史部推鄒某而以鏜副之世廟曰協理院事非
趙鏜不可卽弄印與之鏜旣荷特眷日夜奮勵思所以
報上者爲條六事以獻世廟益器之注意大用矣
而穆宗改元以舊臣移疾歸鏜立朝侃侃負重望一

且退守林泉、恬然若素、無用世意者、當是時、江陵已在
政府、與鍾有同年同館之誼、人謂馳一東道地、立可召
用、而鍾不屑也、曰、吾奚敢忘朝廷第、非自重、如吾志何、
終不與江陵通、杜門讀書、不問外事、興至則與一二
親故徜徉文溪、郎石間、取古人四留之意、更號留齋、居
士有留齋漫稿行於世、

四川按察使馮執夫亮

馮亮字執夫、金華人、嘉靖壬辰進士、初令潤之丹徒、邑
綰南北孔道、民疲於往來供億、亮以身任怨、汰其十七

而民力稍甦。吳中諸郡邑素苦白糧解役。會歲大侵而役不蠲。亮力請於部使者。以贖錢代輸。故隣郡流徙載道。而潤安堵如故。最聞擢兵科給事中。轉禮工左右。復陞兵科都給事中。按成國公希中不法。權貴歛跡。尋陞河南布政司叅政。會歲大侵。至易子而食。析骨以炊。亮極意賑恤。捐俸入爲郡邑倡。所全活無筭。是歲入覲。以治最。賜宴南宮。陞四川按察司使。按諸貪墨吏。無所假貸。望風解綬去者數人。尤盡心獄事。日夕手爰書。獄牘至達曙方寢。遂以此致瘵疾。再請始得歸。行至夔州而

歿年僅四十有四亮素不問家人產而持已特廉河南
入計時吏白羨金萬餘兩公卽不自入不可爲餽遺費
耶亮叱去之曰安有行苞苴焉公者歿之日夔守爲檢
其橐中裝僅餘羨俸數金而已其廉乃益著云